



Progetu finantziau cun su dinai de sa Regione Autònoma de Sardigna cunformas a sa L. 482/99 e a sa L.R. 22/2018

Sa tentazioni in froma de cani biancu

Custa fiat sa noti de missa de bùddusu. Fiat su prim'annu chi fiat bènniu su Vicàriu Druci (Santu Frà Nàssiu) e iat fatu sa missa a cussus de Casteddu. Deu ca fia sposu fia andau a crèsia cun sa fèmina mia e àtera genti meda, ma candu seus lòmpius a crèsia sa porta fiat serrada e nosu seus torraus imparis.

Candu femus acanta de bessiri de pratza de crèsia s'est presentau unu cani mannu, unu grandu cani, ma non fiat mannària de cani.

Is scèminas atzicadas postas si funt a tzerriai: "Ai! Ca si mùssiat. Ai! Ca si mùssiat".

"Tocai", apu nau, "est mannu de badas". Cumentì femus aici, su cani nc'est passau e mi seu furriau, e ita ia a biri? Unu cani mannu-mannu caminendu a dduus peis.

S'est apicurau a su muru de crèsia, nc'est sartau ingudenis e no apu prus biu ni cani ni nienti. Balla arratza de logu.

Su contu de Santu Bennadru

Una borta sa tentazioni boliat fai un unu viàgiu po fai scolliai unu bastimentu in unu scòlliu de mari. Ita at fatu Gesùs Cristu? At fatu bitiri in su bastimentu a Santu Bennadru puru.

Candu funt lòmpius a tretu de su scòlliu, santu Bennadru at fatu frimai su bastimentu e at nau: "Frimai ca andaus a pigai unu buconeddu totus".

Ita faint is marineris? Ghetant is lancionis (s'àncora) e faint frimai su bastimentu. Lòmpius aundi est pràxu a Santu Bennadru, custu at nau a sa tentazioni: "Bà nara! Tui abarra innoi". E ghetau dd'at s'arrosàriu e acapiu dd'at inni.

Imoi candu passant navis in mari artu sa tentazioni tzèrriat: “Stringi Bennadru! Stringi Bennadru!

Ca bolit a ddu scapiai. E Bennadru non passat prus ca est in artura.

Fut sa tentazioni scheta.